



羅浮山志會編卷之十二

長洲宋廣業澄溪纂輯



藝文志三

記二

登山記

元 唐古台

余因分治惠陽舊觀天南仙境有望儒徐心遠約之
 同行如期而至至梅花村心遠不能從余遂攝衣而
 上由鄺仙石歷伏虎巖盤礴八仙石上窮一日之力
 履飛雲之巔是日也宇宙澄清滄海一碧瓣香致敬
 羅浮山志會編卷十二 記 一

須臾雲生足下霧靄天低倏有雙鳧翔舞於是編竹
 為廬席地一宿次早披簑帶雨而下木客長嘯彩禽
 來集望石樓漱水簾憩梅屋尋仙杖觀藥槽出松關
 遇心遠惠予以詩披雲一嘯而回元貞乙未仲冬二
 十日

登山記

陳翊

大德十一年七月惠州路欽奉詔書皇帝登大寶宇
宙更始越十月既望本路同知惠州路總管府事完
顏遣本路教授陳翊躬詣羅浮山請道籙黃閑眞等
設醮升紫壇上綠章祝聖人萬壽太子千秋壇下觀
者數百人

羅浮山志會編

卷十二 記

二

醮山記

元趙孟傑

至大元年十月惠州路同知完顏可山經歷韓良遵
國家舊典率寮案祀羅浮山上祝天子萬壽下祈民
福自梅花村步飛雲頂四顧寂寥山簇水縈暮霞綻
日金碧交粲白雲如氊下隔塵世已而夜轉星移海
曙日出金盤斂弄錦綵搖曳目不可極乃自石樓而
下憩寶積詣冲虛命道籙黃菊巖等蒞祀祀畢陰雲
流布么鳳幽鳴油然雨意見者鼓舞百姓悅乎一時
之盛舉也

羅浮山志會編

卷十二

記

三

何仙姑記

明孫

黃仲衍

南海

仙姑增城何泰女也生唐開耀間紫雲遶室頂有六
毫四歲能舉一釣恆白謂則天童子時唐固未麗武
氏禍也事親有孝行性靜柔簡淡所居春岡地產雲
母嘗夢老人授服餌丹法漸覺身輕健有詩曰鳳臺
雲母似天花鍊作芙蓉白雪芽笑殺狂遊勾漏令更
從何處覓丹砂後果有鳳來集其上遂改名鳳臺云
江北與羅浮山相望嘗曰將遊羅浮父母怪之私爲
擇配結縭之夕忽不知所之留詩屏硯間曰麻姑怪

羅浮山志會編

卷十二 記

四

我戀塵囂一隔仙凡道路遙去去滄洲弄明月倒騎
黃鶴聽鸞簫明早起視家側井逕有遺履而已頃之
有道士來自羅浮見姑在麻姑石上顧謂道士曰而
之增城屬吾親收拾井上履口占三絕寄其家曰鐵
橋風景勝天台千樹萬樹梅花開玉簫吹過黃巖洞
勾引長庚跨鶴來寄語童童與阿瓊休將塵事惱閒
情蓬瀛弱水今清淺滿地花陰護月明已趁羣真人
紫微故鄉回首尙遲遲千年留取井邊履說與草堂
仙子知其後增城李令世英與謝艸堂者表其事李

令乃天台黃巖人始悟仙語無一不有驗云仙姑又
嘗於黍珠庵東壁題一絕字比晉人差清婉少骨壁
後半毀惟餘百尺水簾飛白虹笙簫松栢語天十三
字其下必風字也後二句無人能續之者今有祠在
增城縣南有井尙存卽其舊宅也唐賜仙姑朝霞帔
一襲

倫自幼則聞玉笥之勝欲一往而不可得一日夢游焉至山門入庵中道士睡方起謂曰若所游者夢耶子矍然曰予今之來直真游矣若夢未覺耶語何妄也道士笑曰東海之東南海之南西海之西北海之北上自無始下至皇極皆夢境也伏羲九籙神農軒皞熙穆無爲堯舜禪讓湯武放伐劉項爭雄君者吾不知其爲君牧者吾不知其爲牧百世一夢也朝菌不知晦朔旦夕一夢也蟪蛄不知春秋時月一夢也

羅浮山志會編

卷十二

記

六

上古大椿以八千歲爲春秋八千歲一夢也前混沌死後混沌生天地以十二萬九千六百年爲死生十二萬九千六百年一夢也莊子曰方其夢也不知夢也覺而後知其夢也若夢猶未覺耶若謂子夢夢也謂若夢亦夢也子與若皆夢也若見盧生也方其適也知其適而已不知其爲夢也及其少伸而寤也適安在哉若起草萊登金門步玉堂不三月而南竄去袍笏遠城闕視昔之有其夢也耶其非夢也耶子方謝道士道士辭去乃寤曰其真夢也自是往來於懷

成化丁酉春林緝熙自羅浮來成真游焉黃時憲諸君繼至抵大秀宮宛然夢境矣乃名閣後曰羅浮庵符夢也予顧諸君曰是夢非夢矣緝熙曰安知其非夢乎謂爲非夢恐復爲道士笑也明日各下山去明年見緝熙相與太息曰昨遊成夢矣書夢語庵中庶來者知人生所遇無非夢境也以得喪而欣戚何爲

朱明洞記

明
湛若水
甘泉
增城

甘泉子宏治丙辰同李世卿與諸子遊博羅因曾子魯胡子學造冲虛觀歷大小石樓以覽黃龍諸勝辛酉偕趙元默由增江口而入經梅花村以宿冲虛觀亟以書報胡曾二氏黃時卿氏來會焉求古所謂朱明洞者而卜築焉以爲退居之地朱明在冲虛觀之後左倚蝦蟇玉女諸峯臨以飛雲之頂右挹麻姑峯諸秀掩映流水瀟瀟繞洞前以出冲虛有大石刻曰朱明洞者當其前蓋古迹湮沒已久人所不到極幽羅浮山志會編卷十二記

八

處也於是亟令人伐木剪荆定卜焉栖霞道士李以賢曰吾等當力爲之於是內爲寢者五間前爲堂者五間又前爲門者如寢堂之數兩廊翼之者八間竊以周垣引泉入於廚經始於丁酉之冬訖工于戊戌之秋張千兵世武視工焉

洗心亭記

明羅洪先 念菴
吉水

惠州葉綱齋子計偕歸訪予於陽田居旬日將返與予約曰昔也吾考諸程朱之書自言動食息中於義理吾守其成法不敢自懈今而後知聖人之道不外於言動食息而所以出其理義者要有本也夫心至虛者也而萬感聚焉夫惟致虛故無感而不當吾懼吾心之未能虛而無患乎言動食息之不中於理義也且吾猶有大欲焉吾見撰辭者之善而弗忘諸心也則思與之角勝于藝苑而垂一家言於後世以爲

羅澤山忘會編

卷十二 記

九

吾身不能常有此庶幾不朽爾矣夫以馳騫者之視致虛不啻食荼堇而養生也江河之大不能當漏卮吾竊聞之矣吾將返羅浮之下結洗心之亭屏聞見絕嗜好以致吾之虛以歲年爲期先生其有以翼我哉予躍然曰有是哉吾懼子之不速行也昔吾聞諸友人亦曰言動食息而已矣卒無當焉已而求吾之虛而內膠不釋然也曾不數月而懈心生子其以歲年爲期而無執其成心哉或曰偏靜如之何予曰是猶談升堂而閉之門也門非堂也升堂者必由門果

虛矣時卷時舒萬物爲徒孰得而禦諸

右念庵先生所贈時嘉靖丙辰犬馬之齒二十有五先生執手君母自少予削籍歸年三十七屈指陽明擒寧濠歲不及十有三年撫壯疾馳何患不逮今瞠乎後矣予曰諾萬歷乙亥投檄粵西次年歸羅浮闢石洞歲在丙子先生贈別時五十三屈首先生如先生歉陽明也視聽言動中禮未能求之心去虛遠矣躬行孔子猶闕奈何徒事乎文農夫去草木之不務終必滋蔓故二十年病猶一日

羅浮山志會編

卷十二

記

十

九原可作得無覲乎亭移建洗耳泉下中鐫贈言目擊道存手持太阿自今日始葉春及記

逃庵記

明 葉春及

葉子遷賓州守倦遊至境上書乞髓骨歸廣西巡撫
郭應聘劾守春及逃兩廣提督殷正茂劾如郭奉詔
削爲士伍臣春及頓首世之塵垢欲逃久矣天地固
我陰陽縛我臣安逃哉逃於羅浮之間無所往矣四
百三十二君聞之邀於石洞辟逃庵以居遂不復出

羅浮山志會編

卷十一 記

十一

廣雅曰爲朱明亦曰耀靈羅浮有朱明耀真洞丹丘
日月所常明也記在觀後余嘗操斤斧挾兩黃冠斬
荆棘狄行惡覩所謂朱明者哉日舟而舳之求無幾
矣山兩肘下右砧卓起曰麻姑峯蒲伏而東左蜿蜒
承之綰轂其口環中皆朱明今庵其左牖也聞一庵
吳先生以學鳴翩翩五嶽之長自其子縣大夫下車
則戒徒迎曰日強爲吏羅浮列方祀中大人棄郡歸
終不以孺子故千里徼福四百三十二峯固以請先

羅浮山志會編

卷十二 記

十一

生曰羅浮哉羅浮哉吾鄉羅仲素先生至而春秋明
羅浮何與春秋蠶績范冠而羅浮爲之地吾受經三
世矣吾將驗之至則著書若干篇而去大夫圖所以
藏書者構堂四筵左右翼臺前爲露臺亭直臺下由
亭而臺拾級上門亭之西澗水過之且以爲新豐云
後惠州兩使君來大夫以供屏屨從兩使君曰孝哉
令愛其親而及其所嘗遊宜名愛日大夫曰日強不
敏辭親而仕使君不以爲討而錫以嘉名拜使君之
辱諸生謝恂張萱訪余石洞相與過庵中問所以名

者兩生大夫門人也曰羅浮故有見日庵中夜見日
或曰近取諸身蓋神仙家言也朱明亦有日義他如
兩使君指神仙罷勿談羅浮僻在南海藉令五嶽爲
堂皇九州爲門戶四海爲池十洲爲別館奉先生其
間僱倅之倫時奏眇論大夫卷鞞鞠臚上壽使義和
按節跋烏斂翮魯陽之徒扶馘徐行爲日幾何蓋日
無窮人有盡以有盡遊無窮此彭祖以久特聞也故
世談愛日語子則孝語父則否余聞天莫明於日人
莫明於心日拂扶桑是謂晨明至於衡陽暗昧畢照
懸車虞泉其馬爰息旦而復旦與天罔極君子比德
於日動靜不失其時其道光明虛靈常覺是謂自見
夙夜匪懈是謂自愛父不能私其子師不能私其徒
見而人皆見之愛而人皆愛之然則先生之來昨日
之日也返於閩來日之日也寧有窮哉余嘗與先生
講於壺山其出此矣兩生灑然以告大夫大夫曰被
髮童子日月照之則行不照則止微葉先生孰與知

大人者

羅浮紀遊百字碑

張

萱

西園博雅

天啓七年夏四月郡侯義興徐公督學粵西壬子十
邑士民攀轅朱明洞中構軒曰留舄志後也癸丑
觀洗耳泉甲寅躡水簾洞士民跪進勺水侯三年止
飲此耳揮涕而別歸善令王宏龍川令宋奎光孝廉
韓如璜皆從載筆磨崖野史萱也公名儀世字虞倩

羅浮山志會編

卷十二

碑

七五

歲之己巳予承 命出守惠陽獲爲羅浮一日之主
視事越載稍間與二三賓從往遊焉入山歷冲虛石
洞寶積黃龍洞華首臺諸勝遂登絕巘至分水嶼求
羅浮合處觀之蓋泉源福地是也夜方半見日初出
火輪如山倏騰空洞金霞萬縷隨海濤洶湧有聲如
雷比應劭泰山所見謂鷄鳴時日始出長三丈所其
光怪倍之蘇子瞻云山不甚高夜半見日此亦異也
蓋泰山與羅浮皆濱海故皆見日獨早而羅浮則於
羅浮山志會編 卷十二 記
夜中見日爲天下名山之絕景焉羅浮有二石樓相
去五里其狀如樓有石門俯視滄海予瞻謂人間有
此白玉京羅浮見日鷄一鳴南樓未必齊日觀鬱儀
自欲朝朱明南樓者大小二石樓也雖夜半見日而
未若飛雲之頂所見尤奇飛雲爲浮山絕巔與羅山
竝高羅西而浮東故浮山絕巔見日益早于南樓向
有見日庵傾頽已久予念遊人露宿風雨不蔽爰于
飛雲峯之巔作亭名曰子日蓋以予遊之月爲子而
觀日出之時亦爲子子爲天之一天開於子者天開

子一也康節云冬至子之半天心無改移一陽初動處萬物未生時元酒味方淡大音聲正希嗟夫此庖羲先天之旨也庖羲之封始于子而終于午日君子之學易也貴從子以求其復不可從午而至于剝子也陰之終而陽之始人之終而天之始無須臾而可違得乎子卽得乎日得乎日卽得乎天矣子之作斯亭也不徒結構空中取增勝槩亦欲使遊人顧名思義以無失其天也云爾

遊羅浮記

潘耒

稼堂
吳江

羅浮之奇勝載於圖經誇於志乘雜見於名賢詩翰者不可勝記中州人士之來嶺南者必以遊羅浮爲辭比其還問羅浮作何狀輒唵不能對第言兵燹後山中道梗泉石榛蕪不可遊蓋十無一至者焉余嘗心怪之去冬客羊城卽銳意欲登羅浮謀諸土人尼余者十人而九歲首之端州制府吳公相畱忽忽春盡將告歸公笑曰曾遊羅浮乎遊而還荔枝熟矣啖之歸未晚也余曰善微公言固將一往遂放舟過五

羅浮山志會編

卷十二 記

三

羊遇黎方回爲余言羅浮非難遊苦無棲息地有華首臺者名刹也其主僧塵異適在是必與偕行乃可塵公嗣法天然和尚學通內外相見甚喜載與同行以四月十七日發廣州五十餘里抵南海神廟廟甚宏敞有銅鼓二其一徑五尺餘刻鏤精巧青紅斑駁扣之淵淵是漢以前物其一徑三尺許聲質俱劣宋時物也歷代諭祭碑鱗列兩廡昌黎碑特高大碑陰及兩旁題刻皆滿廟外高阜上有浴日亭蘇子瞻詩碣存焉臨眺極於虎門際天皆海矣徘徊至暮宿廟

側明日行六十餘里抵石灣遙望羅浮蒼蒼亘天如
橫雲明日行二十餘里抵泊頭飯華首下院舍舟而
輿行十餘里雨驟作諸巖岫皆隱不見唯老人峰孤
聳雲外若舉手相招者然又十餘里抵華首則已昏
黑惟見長松夾道流泉淙淙作金玉聲下榻小樓閱
羅浮志將逸勝以遊塵公言志不足憑必得里人熟
習徑路者導遊乃可黎明起見四山皆重雲蒙頭雨
勢未已而山行須竹兜索之近村無有乃伐竹爲之
早飯已與塵公步山門有青黃雀飛鳴林間文采綸

羅浮山志會編

卷十二

記

三

爛所謂五色雀客至則迎者也寺門怪石森立東西
谿交流鎖織中爲平坡圓正如臺故號華首臺舊云
有五百華首菩薩集會于此古刹久廢崇禎間空隱
禪師開法于此博羅韓尙書長公子出家嗣法爲刹
人和尙與東莞孝廉張二果共興此刹尙書夫人施
田飯僧兵後山中諸菴觀皆毀惟此僅存寺後泉石
益奇有合掌巖巨石中空下廣上銳如合十爪有瀑
布落懸巖注於平潭飛流四射如傾萬斛珠墜潭面
輒躍起數尺最爲壯觀而舊未有名余名之曰躍雪

潭潭後爲錦屏峰蒼藤錦石相錯如畫望之蔚然是
暮雨止新治竹兜成而應公所覓導遊者黎老人亦
至遂以次早出遊五里至黃龍徑又二里至延祥寺
基望見梅花村籬落隱隱又十里許至冲虛觀觀故
葛稚川所居唐置祠宋立觀往時宏麗甲一山今蓬
萊閣遺履軒皆廢唯三清殿存其御簡亭葛仙祠則
提督許公郡守呂侯所新葺也黃冠皆散處村落求
觀所藏銅龍魚不可得竹葉符數枚葉上鏤文十數
疊如繆篆亦異蹟也觀後有稚川丹竈遺址竈下泥

云可以療病觀東有澗行百餘步有巨石刻朱明洞
三大字石上有廬稱黃野人廬云觀前白蓮池今廢
爲田西南一峰峭拔名麻姑峰有巖名麻姑壇又有
朝斗壇皆在榛莽中不可到徒倚觀門塵公出所攜
果茗拾落葉烹泉啜之取舊路以歸轉山坳見懸瀑
百餘仞曰是中必有佳境黎老人言此水簾洞也乃
舍輿策杖溯瀑而上爲大龍潭小龍潭爲藥槽石曰
爲大水簾小水簾皆一瀑布也瀑得雨而怒虹奔龍
矯砰訇作雷聲穿澗屈曲行或履危石如劍稜或凌

飛濤如輪轂路愈險境愈奇中平廣處有石坡可坐
數十人飛湍旋激名流杯池云羣仙會飲之所也瀑
流有大小而無枯竭澗中石滌蕩久皆作蒼白色如
凍雪覆泥又如北方白松膚紋明淨可愛宋人篆書
石刻在隔澗懸崖未及捫讀落日銜山促歸華首翼
日乃爲黃龍竇積之遊黃龍洞自黃龍徑折而上有
南漢天華宮故址洞亦以瀑布爲奇與水簾號東西
龍潭勝槩約略相埒瀑中亦有平廣處可鋪文茵可
行羽觴有四賢祠久廢碑在豐草中四賢者周濂溪

羅浮山志會編

卷十二

記

三

羅豫章李延平陳白沙也山佳勝處皆寺觀踞之唯
此環堵爲儒林而居守無人一毀而莫能復也祠之
後爲老人峰瑤臺峰大石樓小石樓皆秀削峻嶒矗
立翠微中乍開乍合竇積寺在伏虎巖之下有梁景
泰禪師卓錫泉味極甘冽泉在石盤中徑尺深尺汲
之隨涌竭之隨注積雨不盈大旱不涸誠爲神異寺
亦久廢新構精舍數楹前俯斷崖臨望甚曠東有一
小潭水亦清冽石刻云林一仙洗藥池而志書不載

與塵公藉蒲團蔭茂樹吟眺竟日烹泉數瓢盡甌中

茗乃歸歸而議遊飛雲峰飛雲峰者羅浮絕頂也雖
晴明時常有雲霧籠覆去地四十餘里遊人希得到
尼余上者復十人而九或言磴道陡峻不容兜輿或
言夏月草長中有飛螞伺人而囓或言山中陰晴不
定遊者多爲暴雨所阻余曰來粵東而不遊羅浮猶
不來也遊羅浮而不登飛雲猶不遊也吾志必往山
靈豈拒我哉塵公見余意堅趣辦行具五更作三十
人飯半以葍食半舁上山供午餐遂自寺右循西溪
上竹篙嶺甚巉削五里至嶺頭稍平坦可乘兜輿又

羅浮山志會編

卷十二

三七

二里至羅漢峰又二里至文殊峰並斬崖爲徑下臨
絕磴雲蓬蓬然起于足下俄而嵐霧四合上下混茫
無所見或慮雨且作余言冒雨遊亦復佳又前五里
許至寶塔峰峰多杜鵑樹有長丈餘大合抱者老人
言春月花開滿山如雲錦婆娑峰下從者進所攜酒
滿引數卮而行又前至小尖峰大尖峰又前至三丫
峰又前至杜鵑峰自寶塔至是可數里往往穿杜鵑
林中行而此峰尤盛叢柯連幹羅生巖間類名園卉
木家人選可徙植者攜之人一本又三里至七星峰

峰有七阜又二里至分水凹林樹茂密一澗中流旁多藥草所謂泉源福地者也又二里至鳳凰臺臺有巨石平正如棋枰又里許至阿耨池池在亂石間徑二尺許渟泓湛碧旁有平石可坐數人老樹蔓雲藤蘿蒼蔚塵公命侍者汲池煮茗出果餅療飢具湯沃飯飯僕夫而別命童子煮糜粥以待是時雲霧漸開諸峰皆出其頂纍纍如青螺髻又里許至見日菴故址有雜樹數百株森梢竟谷又二里許至飛雲頂頂正尖圓四望洞達於時天無纖雲萬象呈露往時所

見大小石樓玉鶯蓬萊諸峰渺在霄漢者皆如培塿帖帖肘腋下其頂可俯而摩也振衣峰巔遊目萬里南望虎門外大海瀾漫一碧無際東見博羅河源象頭平陵諸山北則龍門虎獅天嶺西則增城牛牯南樵諸山如屏如墉如拱如抱綿延數百里不絕而羅浮在其中央若千葉蓮花之葩飛雲頂在其上又若九層浮圖之尖所謂高三千六百丈者殆非虛語至稱夜半見日則理之所無以歷術推之日出地平百里止差分杪高山與平地相去幾何其近海諸山水

光浮日光而上見之差早之罟泰岱泰望天台皆東
邊海故先見曰今羅浮之東連山橫亘無從見水而
東南去海不甚遠冬月登山巔見日當早亦不過晷
刻之間大約如落日時下方昏黑山尖猶存返影耳
而談者遂云夜半披衣見火輪射飛濤以出則夸而
近於誕矣縱覽久之日已晡乃下至阿耨池啖糜粥
以行老人言登飛雲有三路東路由冲虛觀而上則
過青霞玉女會真諸峰中路由黃龍洞而上則過瑤
臺通天中界諸峰西則今華首路若取一逕以上別

羅浮山志會編

卷十二

記

三

取一逕以下再登再下則諸峰之勝盡矣惜乎冲虛
寶積不可棲宿不得已尋舊路歸下山宜易于登山
而峻處每不留足與人尤慄慄余大半步行遇峰巒
佳處輒躊躇凝望不忍別還至華首而日落矣人爭
以無風雨得登飛雲爲賀黎老人亦言生長茲山見
遊山而登飛雲者不過十數人登飛雲而晴明極望
者尤絕少也天下事敗于猶豫而成于勇決余志一
定雨師雲將朱真葛仙羣來相予人定勝天信而有
徵塵公爲余言何不以此勇決者學道聖域可立躋

也余深愧其言羅浮舊志創于永樂時陳琴軒

璉嘉

靖中黎惟敬

民表

續成十二卷典雅可觀崇禎末博

羅諸生韓德焜別撰新志雖文筆不振而每峰每洞各爲圖說則功多于前人矣然吾觀羅浮二山橫亘數十里秀巖溪澗以千百數浮在羅之西北尤大而長今圖經所載諸名勝皆屬諸羅而浮則槩未之及卽羅亦僅東南一隅在冲虛左右者如華首臺後泉石至佳且無述焉况其他乎誠能攜善書者裹糧躡屩周行山之前後左右品題而圖繪之附以篇詠勒羅浮山志會編

卷十二記

三

成一書斯盡善矣塵公豈有意乎余以倦遊遠客勢不能久留茲山雖努力登絕頂猶之嘗鼎一臠窺豹一斑已耳惟當就見聞所及刻畫摹寫仰酬山靈而黎方回留家園黑葉荔枝待我將就之飽啖然後出嶺庶不負吳公盛心且將誇于曾遊嶺南者謂吾所得於諸君獨多也康熙戊辰孟夏二十四日記

跋子日亭記後

羅浮高不及衡華奇不及天台雁蕩然其名竝峙衡華台蕩之間古今無異詞語洞天者標於第七紀福地者命以泉源豈以來自蓬島多靈卉異藥故耶攷之列仙所傳自葛稚川而下成道此山者數十家必有以也有明一代吾鄉先正書院山房二氏精藍宮觀徧滿巖岫士之讀書羅浮者如歸其家吾幼時猶及見之兵燹以來傾毀殆盡矣辛丑臘月予始偕同

羅浮山志會編

卷十二

跋

三

人觀日於飛雲峯頂是時自二三寺觀外無復行人之跡予率僧徒數十刈草蓋頭露宿阿耨池上三鼓而登東方已作海濤霞影光怪變幻紅輪躍出初露一痕倏隱倏見如浮如飛半輪而後天水始辨觀日之奇勝衡嶽遠甚其以地近南溟故耶惠州王使君比以羅浮詩見示其登亦以臘月憫觀日無所爰作子日亭于飛雲之巔信山靈所屬望也所爲詩縱橫闔闔神孤骨峭力瞻氣舉雖云步武子瞻往往有青出于藍之句子瞻謫宦寓惠又羅浮盛時於山有咏

歎而無增益使君一郡山川百神之主不難使羅浮
一復承平之舊將自子日亭始之固不獨其詩視子
瞻爲青出也間嘗謂衡華二嶽蒼莽渾灝不以小節
見奇譬之古文典謨訓誥也天台雁蕩左國也羅浮
莊列也此言雖若附會似亦有至理因與樂亭翁山
評使君詩并書以質之

跋石洞遺稿後

釋成鷲

跡剛東樵

予初與陶子握山相約出家予絕塵先奔禮先師于石洞握山逡巡畏縮竟以老死牖下憶先師坐脫時予歸自羅浮隨俗執喪了無戚容握山過弔哭不能起及握山死予往哭之一如握山之哭吾師也客怪而問曰人盡友也師一而已心喪之哀殺於三月固有說乎予解之曰昔有三人同幽犴狴朝夕束縛誓共出離未幾甲以無罪雪乙則挾藩以逸遺其一獨在縲綆甲與乙謀所以出之不遺餘力而卒無可奈何

羅浮山志會編

卷十二

跋

三

何及甲考終乙往弔之雖有存亡之感猶幸出於獄得正而斃也後其一卒於三木乙往哭之存亡之感不異疇昔然痛已與甲之獨免不能出幽囚於桎梏而哭之慟也夫悲哀之情緣感而動無從之涕君子惡之况至人前效兒女態哉客遂釋然已而入觀握山讀書處廢紙盈案檢之得先師遺稿若干言及小傳一篇持還鏤版以貽後人使微見先師之羸跡不忌故友之苦心且爲挾藩而逸者幸之也

羅浮山志會編卷之十三

長洲宋廣業澄溪纂輯

藝文志四

疏

代道士化見日庵疏

明

黃

畿

宗大香山

鬱羅聳空上風欽仲晦之詩浮游守規中常佩伯陽
之契遺世無若飛雲見日煉丹必於福地洞天火候
須應扶桑山庵已爲茂草有勞筮笈無計旃幪來者
雖樂煙霞去之則愁風雨玉樹翳中黃之灑烝瑤池

疏

一

湮太赤之韶鈞要得般匠躬營還仗方兄首肯同成
善果共購良材所期海上烏飛半夜湧金輪於萬里
庶協身中冬至周年成珠黍於三元

募修羅浮諸名勝疏

明 尹守衡 冲元

人生三萬六千日世上英雄豪傑雖然幾有片時住
足之期羅浮四百三十峯粵中先達名賢竝以此爲
到老回頭之地蓋青霞洞裏讀書樓石壁丹梯湛泉
翁高山可仰洗耳池邊棲隱處茅庵草屋葉桐老石
洞還佳竊念吾儕不向此中漱石枕流這等癡人更
覓何處名山勝水不佞從事四方縱遊吳越每見一

邱一壑金壁輝煌卽有剩水殘山琉璃燦爛直加點
綴便作奇觀載攷羅浮舊誌係居第七洞天璇宮瑤

羅浮山志會編

卷十三

疏

二

室雖曰天固造之地固設之寶殿琪林不知昔也何
多今也何少葛仙翁丹竈藥爐孤邱虎穴文皇帝金
書玉簡荆棘銅駝冲虛觀一洞道房十崩九破黃龍
洞幾間院宇有屋無扉風雨固多漂播人天應有劫
壞過去者已付之浮雲流水未來者還望之檀越元
宗試步梅花月下少憇花陰玉骨冰魂宛存夢寐或
從玉女峯頭側聆天樂風環月珮恍見仙姿似茲妙
境靈通忍使影光埋沒女媧氏鍊五色石補青天滿
見煙青日朗衆君子捨十方錢成善果自令虎嘯龍

嗙達士識山之趣高人絕世之慳不佞故以域中大
勝地望境內大英豪幸億萬衆大布施種千百年大
功德臨疏可勝祝願之至

羅浮山志會編

卷十三

疏

三

莫修羅浮諸名勝疏

韓日纘補仲博羅

原夫蓬碣之標摩窈之境洞天福地勝蹟名區霧鎖雲攢巖崿還資鼓吹奇張界做山靈必賴主盟况羅浮山者遠著道笈近託人寰雖羣真踏踏似迴隔于三千而雙屐騰騰實恣遊夫四百匪三山之風却琳宮貝闕詎任奉蕪豈七聖之路迷瑤草琪葩可堪蒿沒何圖劫數偏屬仙都寂歷空山玉簡金書將漉漫迢遙虛谷雲璈法鼓欲銷沉夜月冷梅花尙覩匝枝

羅浮山志會編

卷十三

疏

四

端蒼蘚每迷古碣訪香臺於世外白雲間出孤僧貝葉落而曇花凋金猊塞而伽鳥戢卽六賢倡學當年亦鹿洞鶯湖詎數椽垂顛今日總神林稷穴謝鯤一丘一壑蒙茸曷辱品題許椽勝具勝情蔚蒼那供枕漱歷覽佳境非一未有厄運如茲竊亮夙具清緣者必憾影光之埋沒遙飛逸興者必思點綴之輝煌者也不佞恭修寸牘遍告十方爲室非求一木廣期禪教破慳綴裘不厭千狐滿望元宗曾捨孰修補而足則媧皇之煉五色孰翺建可施則黔雷之關二儀丹

丘則璫臺蠹而玉戶開八桂森而五芝秀寶剝則散
花霏而流香馥南倡啓而北機清理學則前張法席
後振宗風可供景仰登涉則累榭雲敷層臺景翳足
暢嘯歌庶幾五百年開山不減十二樓飛錫云爾凡
我同人幸成善果共期滿大願力母恡弘大布施臨
疏可任懃懃之至

募修羅浮諸名勝疏

明何吾騶

象岡香山

羅浮洞天福地四百三十二峯從來神仙之所居靈異之所產怪譎之所變志乘之所傳騷人墨客之所歌咏盡此矣懷五岳而見志仰高山以行止其孰不慕之乃數百年來琳宮貝闕蕭寺經亭大半委蕪莽此豈盡山運哉若海韓先生全鍾羅浮出現宰官者有袁道生李煙客黃逢永一世高士因相與謀之茲山之神以次第修復名勝爲願先生慨然作疏真有

羅浮山會編

卷十三

疏

六

二十 騶竊謂佛之教人也戒吝務捨蘇子瞻謂必捨所愛者夫有千金之家十數金非所甚愛也有萬金之家百數金非所甚愛也如此而不能捨又何論所甚愛若捨錢入佛捨家宅作寺者且捨而揮之東海乎何若揮之名山予嘗謂世間稱仙必曰天上夫仙不在天上山之人耳捨十數金百數金而得列名仙府金壁輝煌姓字俱香請挈舟偕親友而過之齋浹登禮後拂碑一讀曰此地常賴君以興是何如其爽快也載筆歌咏勒之貞珉百年千年之後子孫再遊

其地曰吾某祖某公當日捨重金而構此堂此臺此室此閣也一再遊其地而紀之以詩也又何如其爽快也且世間人三餐所需交遊宴會所費公私經營所耗積日月歲時用至不貲矣亦曾有毫釐可留以不盡者乎獨至於修羅浮諸勝有十數百數皆將與所修者或百年計或千年計傳以不朽此亦延促之至不同而我輩之所當猛自省者也且夫人家一歲楮帛祈禱之費又至不貲矣可分毫有着落而神明爲晤對否今以贈仙佛至聖修闢之用世無神仙則羅浮山志會編

卷十三

疏

七

已有必喜而福佑之如之何其吝也如之何其勿捨也吾騶請以是說引於若海先生之後

募修羅浮諸名勝疏

明 崔奇觀

岷澗

羅浮佐衡而峙雄視天南固天南一巨觀也母論載
在道書福地洞天仙靈攸萃卽隸在方服宅離曜真
固人文所關者也夫地旣關乎人文宜往來其間以
迓其休以答其貺而令第草屏翳遊屐軼而不前椽
棟傾頽山靈羞而自匿固刼數之或爾亦人事之使
然善乎韓何二公疏以倡之諸士勸而募之也韓疏
摘麗裁雲務在搜剔靡遺于以侈山之盛何疏言近
指遠務在迎機善入于以醒世之慳夫盛者言乎所

羅浮山志會編

卷十三

疏

八

自始也而示以凌夷而至今日有不凄然動色乎慳
者彼但匿其所有也而示以饒益而獲十倍有不灑
然易念乎球鍾考而木鐸應金鑪挾而甘露隨蓋匪
直廣福田將以維雅道匪直爭形勝將以振文風夫
峯有四百而麗其下者何翅擺指其人洞有羣真而
降在人間者何能更僕而數苟非頓忘歸路疇肯自
昧本心不佞但願其如伐大木前耶後許則願力自
齊如建浮屠從此合尖則階級立見行且少者多難者

易廢者舉屯者亨名山幸甚人文幸甚不佞亦幸甚

余數讀鄉先哲陳公璉湛公若水黃公佐羅浮三志便覺向禽去人不遠然三公皆非羅浮產也遙聞聲而相思尙能爲四百三十二君表章靈秘如此余且自呼爲九嶽山人矣嶽有十羅浮其一此几案間物日當前而不御安問其九不亦慙乎自歸善葉春及卜築羅浮曰石洞余數過之必宿聚霞峯夜半見日而後返歲以爲常己卯冬十月先師金華趙文懿公偕南海黎秘書民表寶安初孝廉衍曾過石洞折簡

羅浮山志會編

卷十三

疏

九

余復獲從文懿公縱觀日出處獻遊羅浮賦萬餘言文懿公擊節久之今亡矣數欲補亡而未逮也歲辛巳余遂携先弟國子仲蔚讀書朱明洞遺履軒中逮壬午同舉於鄉先司徒曰非四百三十二君之靈不及此一作牛馬走頓令鶴怨猿啼每欲尋遂初賦則濟勝無具數歲一至而已不能置身丘壑爲四百三十二君日執糞除之役蓋中心藏之今幸里中宗伯韓公寶安司馬袁公重建朱明洞冲虛觀則鮑葛二公板宅處也具諸名流疏語寸木拳石塊甌片甌皆

舍舊而新是圖計非千餘金不可己己夏四月按臺
宣州吳公行部吾循十邑諸紳縫皆僉謀以共成韓
袁二公不朽盛事余因詳述宋儒胡翼之先生語偕
十邑紳縫請於按臺及藩伯古莆陳公署府司理荆
州李公皆歡喜無量一時郡邑諸當事亦皆歡喜無
量共捐計日之俸以成不日之功此四百三十二君
千載一時也夫二氏之端亦鬼神之說也孔子曰務
民之義余敢有越志憶居長安日常過一神祠題其
兩楹曰惟神聰明正直不能事人何以事神惟神幽

羅浮山志會編

卷十三

疏

十

深元遠與其聽神孰若聽人孔子卽問禮於猶龍然
聖人不師仙余錢家君房雲笈七籤序而行之其說
具在惟是役也韓袁二公儼然首事臺公藩公司理
公郡邑諸當事及十邑諸紳縫躍然終事余於鮑葛
二公能遠之而能不敬之乎白頭壤父歲常操豚蹄
祝滿篝於朱明洞口瓶中幸能宿春亦何敢有越志
竊以三十庾爲冲虛之觀稱事而旣廩焉遺履之軒
則壤父故下帷者文懿公爲南大司成日嘗寄題曰

二妙讀書臺亦宜革故鼎新一時並舉以附韓袁二

公於不朽費卽不貲自當悉索敝賦以從非異人任也嗟嗟壤父視陰矣復能着幾兩屐以徼福於鮑葛二公唯是四百三十二君則六十年前布衣交敢不降心相從以聽翼之先生務民義爲鎮遏龍蛇蚤計若鮑葛二公卽惠而好我天路坐相邀余亦期期不敢聽也

羅浮山志會編

卷十三

疏

二

乙丑之役尹明府冲元何象岡太史崔岷瀾侍御及韓宗伯若海四公實首事焉具在疏語題曰重修羅浮諸名勝復臚列諸名勝於簡端凡二十有二前制府宜興何公檄惠州府以部院贖緩三十金助之主進者寶安友人袁徵君翩也時余抱疴却掃不及一晤徵君與聞其詳不知爾時境內外諸好義者捐貲多寡竟在誰手有成籍否歲丙寅有事朱明洞始知徵君業已經始冲虛舊觀僅揭一材亢於風日中輒

羅浮山志會編

卷十三

疏

七

罷去今且盡而圯矣諸黃冠蹙額曰徵君雅意圖新然絕不相聞者已五年遠袁大司馬復首舉是役豈亦徵君所從與乎第非余里中韓宗伯實任拮据間以見語余亦不得與聞其詳效一臂也今宗伯公以余有一日之長閒居可以將作數四見屬誼不獲辭故再矢一言告諸同事若何稱畚築若何程土物若何具饑糧攻木之工某若而人攻石之工某若而人塗墍之工某若而人丹雘之工某若而人奔走於不時之庸者若而人以庸爲差材必良工必善日省而

月試者閩長曾君奕芳斤君秉中梁君日遷何君九
儀林君樹萼諸工役之請粟者必平其概請鏹者必
平其衡而揣厚薄畧基址則仍舊貫罔敢少愆於素
皆詳著於篇庶捐資者得覆按焉亦惟是三清殿玉
簡亭洞之門觀刻仙祠葛仙祠丹竈亭凡六若遺履
軒余獨任之且先考之以懇諸同事之日省而月試
者其所請益惟白蓮池橋之上建一石棹楔以表臺
公藩公不朽之賜不可不亟圖也余按宋郡守趙公
汝馭嘗構五名勝曰展雲門曰仙春亭曰橫翠亭曰

見日庵而記曰屬博羅令贊其事以明年成載在黃
宮詹羅浮志中蘇文忠公以宋紹聖元年安置惠州
凡四年所四百三十二峯杖履殆遍及徙昌化乃留
家羅浮山下嘗構東坡山房於朱明洞中已具宗伯
公所識不知何年諸黃冠去其名廢爲下院以列庖
屬宗伯公數以語余歸善白鶴峯東坡故居尙存無
恙博羅朱明洞東坡山房可置弗問乎今日之役冲
虛觀旣考成或有餘貲宜重建一亭於泉源福地俗
名分水凹者憩蠟屐以存趙公遺蹟識不忘東坡山

房亦宜一時竝建此又韓袁二公可賈之餘勇今諸
黃冠業携疏冊丐境內外捐助諸好義自當赴響然
出納之司己巳夏五之後乃敢與聞若己巳夏五之
前則袁徵君在敢布腹心

羅浮山志會編

卷十三

疏

十四

募修羅浮山寶積等寺緣疏 鄭 鄭

羅浮爲十洞天之一名勝甲於寓內余以家慈香愿來登飛雲之巔宿大橡樹下爰得異感時僕夫遺火石不可得炊瞑色已重四無人煙羣猜且當吸露俄而微光吐焰於林間衆共驚視乃有濕柴在水坳中水浸之而不熄黃梁就烹遂獲煖觸之利是一異也同遊諸子舉青蓮海日天鷄之句或謂有海日而無天鷄及四更許見初暘升忽然耳邊鷄聲一鳴聲甚小而長三十里內無復廬舍是聲胡爲乎來哉是又

羅浮山志會編

卷十三

疏

五

一異也若乃冒雨初登而不遇雨席地憩臥而毒蟲皆避疑不聞鳥聲遂見五色鳥飛翔來迎疑無山獸則有玄猿挂於隔崖樹間擲身見人而笑種種不可更僕予遊名山多矣未有靈異若斯者也然亦未有數十里內荒曠若斯者也環山稍可憩者獨有寶積寺寺僧獨十虛一人虛本楚僧宗說兩通書奕擅技來羅浮都置不談手自作務混跡勞侶先是山中人望寺有光疑地有宿藏共畚發之乃得二鐵像攷其

記爲梁初智藥三藏景泰二禪師像像出光遂隱時

值虛初來虛豈其後身耶寺有卓錫泉坡仙評爲入
粵第一泉水簾澗梅花村環繞左右勝甲羅浮然亦
荒曠數椽而已余謂諸子欲羅浮便於遊者宜於山
巔復見日庵之蹟下此而天廚泉次玉女峯邊皆當
有茅舍或石亭以僧守之聯屬及於寶積使遊人隨
至可憩而後羅浮之奇可得容與盡也則今嘗以寶
積爲經始十虛云博羅韓太宗伯業許爲檀越今仁
勝集應是寶積緣生時也余宿曾習宗伯卓然隆望
何減坡公題泉而後當又開一生面矣于時諸子舍
兩尊人祈安并書其意爲題諸冊端而去

募修羅浮諸名勝疏

明 袁崇元素 東莞

余生平有山水之癖卽一邱一壑俱低徊不忍故
十四年公車強半在外足跡幾遍宇內而羅浮洞天
去余家不四十里竟無暇盤桓其中徇外忝內余罪
也去冬予告歸方謂築室其中爲終焉之計未抵家
而明主促之再出使者絡繹道路兩旬席不暖又塞
上征夫矣其尙得與山靈作主人哉山中道士亦悵
然于余之行因林凡夫丐余言于募疏以風好善者
時車馬僕夫旁午戒行何能爲應抵關上而友人鄧

羅浮山志會

編

卷十三

疏

七

伯喬李煙客請歸煙客向與吾姻家緒仲宗伯謀興
構山中各洞院宇脫者新之其空曠處阻遊人趾而
不能徧取諸勝者各爲亭室以通之余嘉其志而爲
之言曰羅浮在宇內二十四洞天中載出丹書石室
甚備緣僻居南徼游人鮮得過而問之宇內若不知
有山靈而山靈則能貞之宇內也蓋山以靜爲體無
所擾之自止于寂無所混之自依于淨山靈又何樂
乎多方點綴以減其天真耶煙客曰自有此山以來
其中爲山靈護法不知幾許庵堂觀院成而毀毀而

成不知幾許山靈俱以爲過眼之空花浮身之泡影
吾以了吾念且借山靈以合大緣於世宙終南非捷
北山不移何足爲山靈重庶不爲山靈累也余笑謂
之曰山之人爲仙仙者長生久視之謂今仙人安在
哉則仙之亦歸於盡明矣惟山終古以長存則人靈
不如山靈然山常良常止止得其爲山人旅生旅死
不失其爲人余又以爲山靈之不若人靈也靈與不
靈吾安從辨之不若兩忘而化之于道至重興福地
會納有情無爲而爲所謂吉祥善事也不山耶山
羅浮山志會編卷十三疏

六

不人耶都不必計願有志者易之

又

袁崇煥

李煙客偕伯喬歸興羅浮有日矣余其何能忘因憶
昨來與伯喬過瞽溪寺僧告我云慈太師入寂時曰
我三十年後還以宰官來此修大殿余笑之曰是和
尙癡矣何不曰願得有情重新紺宇不必苦我之重
來蓋善緣何必自己出哉余將爲之所余至遼東一
日與李上人言及此事憶以爲身上不了者上人曰
宰官差矣何不轉一語曰願得有情完此功德又何
必自宰官手哉余頓足而懺悔於是悲我見之難空

羅浮山志會編

卷十三

疏

九

今煙客南歸爲羅浮計而余無所以相助一一聽之
則又落人見矣夫隔四十里之名山不能一效其欸
欸而一萬里之醫巫閭忘身徇命以與邊徼爭余媿
也然地有南北山之靈山之性何分南北則醫巫閭
之未始非羅浮也則用心於醫巫閭與用心于羅浮
無二也則煙客與余二身也一心也一心而兩山也
不隔也異日自見之自如子同日又跋

夫空曠阻絕隱闕靜深去人間煙火惟恐不遠者山之幽韻也精藍異刹宏構廣修表章仙靈之窟宅使與人境不隔者人之善緣也故崇宮夏屋鞭石斬林無非人世罪業惟以施之名山寶地則種種俱是福田繇此觀之人自藉山靈爲善緣耳山靈則何藉于人哉吾粵羅浮肇自蓬萊佐命衡嶽兼洞天福地之勝而夜半見日則五嶽岱宗而外無聞焉獨以僻在嶺外表章者少坐使山靈得以傲其空曠阻絕隱闕

羅浮山志會編

卷十三

疏

字

靜深之韻與人境若隔余乙卯休沐裹糧往遊宿飛雲頂夜半觀滄海日出與華萼諸真相晤于若醒若夢間有世外之期嗣來埋沒塵鞅忽忽十餘年今倦遊燕市中念宿願莫酬河清不俟未嘗不冷汗浹背忽伯喬煙客歸自榆關出袁大司馬所爲羅浮募緣疏相示願得有情完此功德大都借山靈以合大緣于宇宙輒不覺欲投體飯依居恒謂人生剎那間空華幻泡凡宇內名山勝地目力之所及寓足力之所及遊財力之所及施盡屬大因緣宿世善根所種昧

者機緣淺薄當眼亦自錯過大司馬肉食菩薩方在
戎馬倥偬發此宏願以牙後慧金篋挾翳曾勸世人
凡茲一切有緣寧肯再自錯過夫得斗粟者食之立
盡耳春播之土秋穫成庾廩矣彼不知有秋之穫者
惜其棄食粒于淤泥不亦昧乎吾願諸善知識各隨
力量自覓善緣無與羅浮當眼錯過使得長自傲其
空曠阻絕隱闕靜深之韻也雖然吾聞之宇內洞天
福地皆有佛王主之彼無時不發大乘願普度有緣
豈真欲長自傲其空曠阻絕隱闕靜深之韻以自限
羅浮山志會編卷十三
疏
也
小乘也者則又安見人世之善緣不爲山靈之功臣
也

募修羅浮諸名勝疏

明陳子壯

集生南海

學士多言神仙家如黃石之赤松衣白山人之衡嶽其彰明易稱據者也彼雄鶩之主紛紛入海求蓬萊安期之屬而臣朔以偷桃避世金馬門而不覺貞白挂冠神武而不能忘懷於吉凶征討之數以華陽隱居自署而不能脫山中宰相之名之二者又將奚居何宦籍邈滄海之觀而名山反致問答之緣也噫嘻天地大矣太史公謂大荒之內名山五千其在中國有五嶽作鎮羅浮括蒼輩爲佐命於五千而有五嶽

羅浮山志會編

卷十三

疏

三

五嶽之佐有羅浮羅浮之區有我而我迺據羅浮以爲尊選一邱以自宅不猶然域於觀哉然而超士通儒每仍之而無替者何也聞之夜半見日方於登封山澤之氣通焉蓋坎離交而內外合此儒仙之一致也故鮑葛單王以之遐修濂溪豫章於斯澄悟琴軒甘泉泰泉諸先達之所以興廢存亡者此其概也然吾謂茲山惟不列五嶽僻於嶺徼封禪不得有事仕宦不得借徑以全其幽邃要眇之體而無損高真歷落之致所以可愛而傳者惟此客秋赴闕經廬山涉

天池佛手間見老衲而訪周顛仙之遺求所爲竹林
寺前後渺不可信顧惟詳近年之事闖亂政士大夫
竄名或祝髮而菴者往往而在因思其時越嶺而匿
間有之而可爲空谷之音矣使瑤室璇房庵其庵而
復有吾羅浮哉傳曰苟非其人道不虛行興廢存亡
之故待其人之行也審矣不佞壯初以罪廢不復經
始旣憂廢不敢與於中興總總然銖兩東方句曲之
異甚欲致慎其所以重名山無苟以名山重若惠好
不忘鼓舞作新以盡仙儒之致名實之理而卽爲韓
也

袁諸公他日之穀城衡嶽者甚樂於攄其效以有成

募修羅浮山寶積等寺緣疏

陳元藻

慈谿

甲寅歲余兩奉使東西粵道經羅浮山麓弗獲一訪
洞天勝竊自媿仙緣薄也茲幸以海南北量移惠
陽則羅浮咫尺可到矣寧俟碧眼胡僧饒舌耶顧峯
巒奇絕猶昔寺宇半屬荆榛焚修之田俱入豪家之
籍緇流流落殆盡良可扼腕有十虛上人以大慈悲
發大願力欲募十方善信重興舊址因爲之讚歎不
已上人楚人也雅慕羅浮而卓錫茲淨土也善詩善
奕不詩不奕則逸於禪余嘗謂金剛玅義止在無所

羅浮山志會編

卷三

疏

五

住而生其心課音律既墮文字之障木野狐作祟於
定慧何居乃上人以了悟爲宗靈惺爲用恬澹而出
之以自然與袖穿齒落者霄壤而入神坐照具體通
幽坐談中元有懸解上人指點若神授寧止鬼陣相
攻已耶實諸所有空諸所無詩乎奕乎上人蓋深乎
禪矣蕭散森疎道化翔洽粵人士無不禮白足而施
金錢何俟余贅乃上人欲藉余護法因勒短疏普告
十方蓋凡夫流淪苦海障在慳貪呼吸無嘗積聚總
屬長物卽營營爲若子若孫計老鬻髀寧知身後倚

頓黔婁耶故須達多長者捨八百千金布八十頃地
良有以也多作諸惡不如修一善心修一善心能破
百種諸惡譬芥子卽同須彌投芥子火必能燒盡何
以故火能燒故種少善根亦復如是土麩一掬供佛
來生便王閻浮提婆羅門不信佛法輒羅黑鬼厄禍
青蚨聚散相仍元廬果報不爽涓滴可裨海嶽一錢
造福髓腦堪資檀樾四大微塵願爾等聞緣隨喜苦
海同登彼岸此上人度世慈航余爲之重宣教鐸如

風雲頂刻立就梵林色相莊嚴余遍覽三十二

羅浮山志會編

卷十三疏

三

惟天酬二十年來夙願頂禮十方善信功德無量矣

謹疏

募修羅浮山寶積等寺緣疏

明

李

模

灌縣吳縣

按羅浮二山居洞天之七當增博兩界爲粵地之冠
瓊樓玉宇昔已見其巍峩礫砌頽垣今何久其寂寞
皆因潤澤無人遂使山林失色故朱明有洞僅借書
幌以耀靈而見日無庵誰傍元關以拱旭蕪靡侵其
芝室卽玉女亦懶乘鸞楸棘障其丹壇總金仙何心
跨鶴毒龍空閉穴久失制於安禪啞虎日迷塗已莫
控于羽客縱使尋真有路雲封蓮頂鐵橋寒竟至探
勝何人露宿蓬壺瑤石冷是宜百步一亭千步一庵

羅浮山會編

卷十三

疏

三

庶可棲真而憩尋幽之侶必使一人操筆百人畚插
始得隨地而成經始之營今者布金有地長者難逢
况乎裝寶無期良因易度二師現靈已寄光於鐵像
十虛積苦深憫晦於銅駝欲從寶積創興以至瑤池
底績工雖無量募竊有緣一鉢當山龍天獄府當亦
鑿其丹忱四體投地鳳閣宰官寧能吝其青盼倘積
少以基多瓊宮卽寓莖草惟自近以勸遠蓮臺可觀
琪葩仙緣佛緣憑念之妙喜以結生果冥果借金之
割捨而成輦貨肯來載福以往使功肯構朱甍絕巘

飛霞而德招提白衲半龕栖雨况有亭可憩不妨整
頓芒鞋且無宿可處一任閒憑雲插由是瓊漿堪飲
何止錫泉况有雲粉當餐不須珠黍是在檀越之指
掌樂助便可揭掀惟龍象之頂祈苦瀝以垂哀憫謹
合十指代疏萬緣是禱

羅浮山志會編

卷十三

疏

三

募修羅浮山寶積等寺緣疏 陳子壯

大荒稱中國名山未及五嶺之外羅浮爲南嶽佐命
又居七洞之中安期聚會于玄丘葛令栖真于青觀
時聞鶴馭幾見蜨衣飛雲號爲絕巔屹立青霄之際
見日常於夜半俯視滄海之流下此則莽蒼甚遙中
皆蒿萊不剪而寶積寺者旣接泉源福地况當鉞柱
石樓東有水簾梅花之村西有黃龍蓬萊之洞形勝
宛如飛鷲歟少莊嚴虛空不住降龍頓成荒廢楚僧
十虛少善奕書早依餅鉢挂衣而宿桑下雖恩愛不

羅浮山志會編

卷十三

疏

五

生荷畚而薙林中則筋力有限先是鐵像之光始露
如舍利呈祥已而錫杖之遊止臨恍摩尼來照屢溷
踪跡於儕輩僅免饑寒於歲時其所益者色身常借
檀那作主其所修者白業必資蘭若怡神韓宗伯發
隨喜之緣鄭太史加從史之葺捐資先後大構招提
第功果難於獨成而善事必須衆建散金布地須達
多成給孤之園跌草琪林孔長史置經行之室古來
興起皆有主持游選佛之場豈少爲宰官爲居士禮
飯僧之苑亦有善男子善女人類散有限之財共作

無量之福分千樹一葉之影卽是濃陰滅四海一滴
之泉便成膏澤然後法身現於百由旬內淨界成之
一刹那間功埒五王有漏翻成無漏福深二梵今生
倘是來生

羅浮山志會編

卷十二

禿

募修羅浮山寶積等寺緣疏 蘇元起

羅浮僻在嶺南其中蓬島洞天仙釋窟宅余平生所
神遊也夢清頻入栩栩五城十二樓然終不若振衣
飛雲玉鷲之上之爲真歲戊辰叨令博邑私喜几席
山川柱頰觀爽可引屐陟巘可至詢之則云去縣郭
五十里而遙且簿書鞅掌登臨無暇山靈胡慳余乎
哉茲楚僧十虛聞關萬里卸笠於山之寶積寺尋舊
址新之惠陽諸生願力護持併請余言夫羅浮余所
未至者安能言之曾閱郡志羅浮梵宮晶域蟬聯星
羅浮山志會編 卷十三 疏
錯而寶積尤爲叢林冠冕蓋以卓錫開山也西域八
功德水其發竅于粵者香若南華冽若雲封而其清
涼滑甘則莫若卓錫故諸刹卽頽圯須緣募化必先
營寶積始亦曰是智藥景泰二師之鉢針大旨也修
習水觀入三摩地從此遍葺諸刹圓滿功德倘鳩工
庀材其誰不愛而助之聞之馬祖築庵山鬼助役况
夫知識衆生不自謂祝釐地乎坡公曰粵人輕施樂
捨以有愧思二法助發善心夫冥果生果總根自心
歡喜也十虛苦行修證又得善心護持夙構之榛莽

盡開特地之乾坤頓闢凡延祥南樓諸寺煙榭雨臺
悉爲煥如余將徼山靈未了之緣問道耀真踏雲躡
磴以縱目鼎新景象復探源卓錫滌六塵洗五濁庶
愜夙願焉昔坡公入廬山自謂不識面目然橫看成
巖側成峯則旣已識之矣身之所至其景自真此中
琉璃金碧余當收歸吾里與騷人豪士侈談佳景以
當輞川一圖方諸平生栩栩清夢不尤愉快乎余不
善談禪且諸名公蓮舌讚歎成破禪機余安庸贅之
故惟抒其臆若此

募修冲虛觀疏

陶

敬肅公
江寧

冲虛觀在羅浮之陽固四百峯之十二樓而朱靈芝
葛洪鮑靚黃野人之流相繼棲真煉神羽化飛昇之
地也創於唐名於宋盛於洪永隆萬之間邇者貝闕
琳宮香臺古碣滿目丘墟雖地運衰旺之相尋亦物
力艱難之所致爾余生長三吳每有逍遙五嶽之志
金輪九子牛首諸峯芒鞋幾遍猶栩栩然於古梅花
下長髯囊中向四百君訂忘年之交未幾而宰博之
命下蒞任期年民和事簡一鶴晝閒雙鳧夜寂於以

羅浮山雲會編

卷十三

疏

三

鬯厥山靈潤色前徽正惟其時語曰五百年名山一
開必有名人爲之主盟余則豈敢然而竊有志焉爾
乃選勝尋幽而見夫福地荒涼零落之狀不勝扼腕
欲首舉冲虛而經始之又念窮簷鴻鴈杼軸其空貢
賦索於前饑寒逼於後莫不疾首蹙額爲賣絲糶穀
之計安能強之生歡喜心以種此未來之因果乎哉
用是布告于當事大人薦紳先生共宏願力同結清
緣或捐俸以資或解犀而贈庶幾前邪後許衆志成
城况名山有赫焉知不鞭石畫水以效靈乎幸毋謂

山水閒情無補經綸事業母謂工程浩莽非片瓊一
木能支但得相與有成亦點綴太平之盛事爾噫羅
浮孤峙嶺表而聲聞天下海內之紳縫隱逸緇素黃
冠以及估客鮫人樵夫牧豎聞其罡風灑氣雨澆煙
巖罔不心焉慕之每歎爲紺宇璇房琪林瑤室莊嚴
瑰麗甲天下而不意其荒涼零落如是推之人民事
物山川土田大抵皆可作如是觀也職斯土者可以
深長思矣

羅浮山志會編

卷十三

疏

三

文

朱明道院上梁文

馮元颺

靈山開落亦關小劫因緣勝刹崩興合聽人天普會
故龍沙迎而聖人示化琪樹茁而佛祖演乘屬在同
人可昧因地羅浮居洞天第七朱明當複嶺初層擷
秀南離福曜遠騰於十嶽鍊形地肺虛危每集乎羣
眞絕粒茹芝政賴巖巒之姿覓超情釋戀蓋資雲縠
之氣鮮然而翠巘荒蕪野鳥虛傳快樂羽衣散落踏
歌徒歎冥寥使四百三十二峯夜半無人看日出將

羅浮山志會編

卷十三

上梁文

三

三千大千諸界天中何路續仙遊必令棲託好佳始
得精靈肅聚所以坡仙晚出實嘉定惠同遊若士南
來遂有徐聞一賦稚川不援岫嶠便冷丹砂梅魂偶
夢師雄聿來窈窕豈伊姝勝坐阻躋攀宮闕渺羣帝
之通縱携宣遠驚人詩誰憐搔首林水缺通人之過
卽涵小有仇池穴空爾埋煙地倚鍾靈事如有待用
啓吾師若翁韓大宗伯道炳開山式闢榛塗首號如
龍之衆載挺行邊自翁袁大司馬勳高蕩海益流檀
度竝宏神鷲之音嗣是魁壘儒宗璜球宰士上逮擁

旄分鎮之老絃歌出牧之英菴弗歸義如林導慈遵
捨凋甍夕爛洮珠自捲西山紺殿朝輝雲幙長霏北
坵莊嚴布地繇來鳥自銜花表異疑神遂有猿來獻
果希深睇神清之洞豈啻人工曷老戲芙蓉之城似
緣天造實稱偉麗足掩前規接濟流通凡聖仍容雜
處補偏貼陷徂孫寧阻絕攀從此招洽隱淪應有道
開子野之流御風騎氣跳出塵寰以師友造化政使
教興講院遙臻公甫甘泉諸老崇正闢邪紹隆聖學
而翊衛人綱恃此不日之成已濟天下之溺願諸英

羅浮山志會編

卷十三

上梁文

三

髦貴俊盍歸來拈一瓣香卽復旅泊羈遊試登臨叩
三生石行見道林宗旺時響雲璈而撾法鼓輒喚起
虎跑龍吟庶幾逋客嘲銷豐披芟製而狎荷衣姑判
抹猿驚鶴怨謬緘致語遠讚拋梁猥俗懺除敢曰元
通三昧仙靈樹止將無旋下五雲日月蔽虧四序松
筠歸闕血山川呵禁六時風雨淨妖氛斬千百國共
奠金鷗祝億萬年永綿聖歷白少傅嵩邱紀歲數名
利長能沒人韓昌黎鱷渚留聲羨江山終堪作主努
力荷擔勿負清時幸念景光專精愛日未遑均賦聊

頌四聲浮峯羅嶽氣兼秋
削巖嵯峨跨十洲日觀新
恢天不夜翠亭春洗月常
流竭來帝子飯金粟遮莫
仙人駕赤虬妙蹟只今依
玉斧勝情容易到丹邱

羅浮山志會編

卷十三

上梁文

三

羅浮山志會編卷之十三

終

